

**Ko te Pukapuka a Paora Āpōtoro  
ki te  
HUNGA O PIRIPAI  
Kupu Whakataki**

*Ko te Pukapuka a Paora Āpōtoro ki te hunga o Piripai i tuhia ki te hāhi tuatahi i whakatūria e Paora i te whenua o Uropi, i te takiwā o Romana o Maketonia. He mea tuhi i te wā e mau here ana te āpōtoro, i te wā hoki e raruraru ana ia i ōna hoa Karaitiana tohetohe, me tōna āwangawanga hoki mō ngā tohutohu teka a te hāhi i Piripai. Ahakoa tonu, i tēnei tuhinga, ka pā mai te hau o te hari koa me te māia, e taea te whakamārama, nā te hōhonu o te whakapono o Paora ki a Īhu Karaiti.*

*Te tino pūtake i tuhia ai tēnei pānui he mihi atu ki te hunga Karaitiana o Piripai, mō tā rātou koha i tuku whai hei āwhina i a ia i tōna rawakoretanga. Ka whakaritea e ia tēnei wāhanga hei whakaahuru i a rātou, kia māia kia pakari rātou, ahakoa ka pā mai ōna raruraru me o rātou hoki. Ka ĭnoi ia ki a rātou ia mau te āhua māhaki o Īhu, kei riro rawa mā te kaiapo e whakamau te hao nui me te whakahī. Ka whakamaumaharatia atu e ia, nā tō rātou kotahitanga ki a te Karaiti, he koha nā te atawhai o te Atua, i riro mai ai i a rātou nā tō rātou whāinga i ngā kawa o ngā ture Hūrai. I tuhi a ia mō te hari me te rongomau ka riro mai i te Atua, ki a rātou e noho kotahi ana me te Karaiti.*

*Ko te tohu o tēnei tuhinga i hāngai tonu mō te harikoa, te māia, te kotahitanga, pakaritanga i roto i te whakapono Karaitiana me te orange. I*

whakaatu mai hoki i te atawhai hōhonu o Paora mō te hāhi i Piripai.

### **Rāpopoto o Ngā Take**

Tīmatanga 1.1-11

Te āhuatanga ake o Paora 1.12-26

Te oranga i roto i a te Karaiti 1.27–2.18

Ngā whakaritenga mō Tīmoti rāua ko Eparatoru 2.19-30

Ngā whakatūpato mō te hoariri me ōna whakawhara 3.1–4.9

Paora rātou ko ōna hoa o Piripai 4.10-20

Whakamutunga 4.21-23

### *He Mihi*

<sup>1</sup> Nā Paora, rāua ko Tīmoti, nā, ngā pononga a Īhu Karaiti –

Ki te hunga tapu katoa i roto i a Karaiti Īhu e noho ana i Piripai, rātou ko ngā pīhopa, ko ngā rīkōna:

<sup>2</sup> Kia tau ki a koutou te aroha noa, me te rangimārie, he mea nā te Atua, nā tō tātou Matua, nā te Ariki hoki, nā Īhu Karaiti.

### *Te Īnoi a Paora mō te Hunga Pānui i Āna Tuhinga*

<sup>3</sup> E whakawhetai ana ahau ki tōku Atua i ōku maharatanga katoa ki a koutou,

<sup>4</sup> i āku ĭnoinga katoa, e puta ana tāku ĭnoi mō koutou i ngā wā katoa i runga i te hari,

<sup>5</sup> mō koutou i uru tahi mai hei tautoko i te rongopai, mai o te rā tuatahi ā moroki noa nei.

<sup>6</sup> Pūmau tonu tōku whakaaro ki tēnei mea nei anō, tērā te kaitīmata o te mahi pai i roto i a koutou e whakaoti, taea noatia te rā o Īhu Karaiti.

<sup>7</sup> He tika hoki kia pēnei ōku whakaaro ki a koutou katoa, nō te mea kei roto koutou i tōku ngākau; arā, ahakoa i ahau nei i te here, ahakoa i ahau e kōrero whakaara nei, e whakaū nei i te rongopai, ka uru tahi koutou katoa me ahau ki te aroha noa.

<sup>8</sup> Ko te Atua hoki hei kaiwhakaatu mōku, mō te nui o tōku kōinga ki a koutou katoa, i runga i te ngākau aroha o Īhu Karaiti.

<sup>9</sup> Ko tāku ĭnoi anō tēnei, kia nui haere tonu tō koutou aroha i runga i te mātauranga, i ngā mahara mōhio katoa;

<sup>10</sup> kia whakaaetia ai e koutou ngā mea papai; kia kore ai ō koutou tinihanga, ō koutou hē, ā, taea noatia te rā o te Karaiti;

<sup>11</sup> kia kī ai hoki i ngā hua o te tika, e puta mai ana i a Īhu Karaiti, hei korōria, hei whakamoemiti i te Atua.

### *Ko te Ora, ko te Karaiti*

<sup>12</sup> Nā, e mea ana ahau kia mātau koutou, e ōku tēina, ki te tukunga iho o ngā mea i pā ki ahau, pai tonu hei whakaneke ake i te rongopai;

<sup>13</sup> kua kitea hoki ōku mekameka mō tā te Karaiti, puta noa i te wāhi katoa o ngā hōia tiaki i te kīngi, i ērā atu wāhi katoa anō hoki.

<sup>14</sup> Kua ngākau nui hoki te tokomaha o ngā tēina i roto i te Ariki, i ōku mekameka nei, hira rawa anō hoki tō rātou māia ki te kōrero i te kupu, kāhore he matakū.

<sup>15</sup> Ko ētahi nā te hae, nā te totohe, i kauwhau ai i a te Karaiti; ko ētahi nā te whakaaro pai;

<sup>16</sup> ko ētahi nā te aroha, e mahara ana kua waiho ahau hei kōrero whakaara i te rongopai;

17 ko ētahi nā te totohe tā rātou kauwhau i a te Karaiti, ehara i te whakaaro pono, e mea ana ki te whakatupu mamae mōku e mekameka nei.

18 Ā, tēnā pēhea iho? Anei rā, ahakoa tinihanga, ahakoa pono, e kauwhautia ana a te Karaiti; ā, e hari ana ahau ki tēnei. Āe rā, ka hari anō ahau.

19 E mātau ana hoki ahau ka ai tēnei hei whakaora mōku, i a koutou nā ka inoi, i te Wairua anō hoki o Īhu Karaiti ka hōmai.

20 Ko tāku hoki tēnei e whakamau tonu nei, e tūmanako atu nei, e kore ahau e whakamā i tētahi mea, engari ka tino māia ahau, ā, ka pērā me tō ngā wā katoa, ka whakanuia anō a te Karaiti āiane e tōku tinana, ahakoa i te ora, ahakoa i te mate.

21 Ki ahau hoki ko te ora ko te Karaiti, ko te mate he taonga.

22 Ki te ora ia ahau i te kikokiko, mehemea ko te hua tēnei o tāku mahi, heoi, kāhore ahau e mōhio ko te aha tāku e whiriwhiri ai.

23 E karapitia mai ana hoki ahau e ngā mea e rua, he hiahia nei tōku ki te haere, kia noho ai ahau ki a te Karaiti; ko te mea tino pai rawa hoki tērā.

24 Ko te noho rānei i te kikokiko, ko te mea pai ake hoki tēnā mō koutou.

25 Nā, ka ū nei tōku whakaaro ki tēnei, e mātau ana ahau tērā ahau e noho, āe rā, ka noho iho ahau ki a koutou katoa, hei whakaneke ake, hei whakahari i a koutou i runga i te whakapono;

26 kia hira rawa ai tō koutou whakamanamana i roto i a Karaiti Īhu ki ahau, mōku ka noho tahi anō me koutou.

27 Engari, kia tika tā koutou whakahaere, kia rite ki tā te rongopai o te Karaiti. Nā, ahakoa

tae atu ahau kia kite i a koutou, ngaro mai rānei, kia rongo tonu atu ahau ki tō koutou āhua, kei te tū koutou i runga i te wairua kotahi, i te ngākau kotahi, me te tohe tahi anō ki te whakapono o te rongopai.

<sup>28</sup> Kāhore hoki he wehi ki tētahi mea a ō koutou hoariri. He tohu hoki tēnei ki a rātou mō te whakangaromanga, ki a koutou ia mō te ora, i ahau mai i te Atua.

<sup>29</sup> Nō te mea kua hoatu ki a koutou hei mea-tanga mā koutou ki a te Karaiti, ehara i te mea ko te whakapono anake ki a ia, engari ko te mate anō hoki mō te whakaaro ki a ia;

<sup>30</sup> kei a koutou hoki taua pakanga i kite rā koutou ki ahau, ā, ka rongo nei ināianei kei ahau.

## 2

### *Te Ngākau Māhaki me te Whakahirahiratanga o Īhu*

<sup>1</sup> Nā, ki te mea he whakamārie kei roto i a te Karaiti, ki te mea he pēhi mamae tō te aroha, ki te mea he whiwhinga tahitanga ki te Wairua, ki te mea he ngākau aroha, he mahi tohu,

<sup>2</sup> kia rite tōku hari i a koutou, kia kotahi te whakaaro, kia kotahi te aroha, huihuia ngā ngākau i runga i te whakaaro kotahi.

<sup>3</sup> Kei meinga tētahi mea i runga i te wehewehe, i te whakapehapeha rānei, engari i runga i te ngākau pāpaku, me te whakanui a tētahi i tētahi ki runga ake i a ia.

<sup>4</sup> Kāua tēnā o koutou nā, e titiro ki ōna mea anake, engari me titiro anō tēnā, tēnā o koutou ki ngā mea a ētahi atu.

<sup>5</sup> Ko tēnei hei whakaaro mō koutou, ko tērā i a Karaiti Īhu:

<sup>6</sup> Ahakoa hoki i a ia te āhua o te Atua,  
kīhai i meinga e ia te rite ki te Atua  
hei taonga kapo mai.

<sup>7</sup> Engari i mea i a ia anō kia pōaha,  
ka mau ki te āhua o te pononga,  
ka meinga kia rite ki te tangata;

<sup>8</sup> ā, ka kitea nei tōna āhua e rite ana ki tō te tangata,  
ka whakapāpaku ia i a ia,  
ka meinga kia ngohengohe, ahakoa ki te mate,  
āe rā, ki te mate o te rīpeka.

<sup>9</sup> Nā konei whakateiteitia ake ana ia e te Atua,  
ā, hoatu ana ki a ia te ingoa nui atu i ngā ingoa katoa;

<sup>10</sup> kia tuku ai i runga i te ingoa o Īhu  
ngā turi katoa, o ngā mea i te rangi,  
o ngā mea i te whenua,  
o ngā mea i raro i te whenua;

<sup>11</sup> ā, kia whakaae ngā arero katoa  
ko Īhu Karaiti te Ariki,  
hei whakakorōria i te Atua Matua.

*E Tīaho ana he Māramatanga i roto i te Ao*

<sup>12</sup> Heoi, e ōku tēina aroha, he mea tonu ia nā koutou te ngohengohe ki ahau i ngā wā katoa, ehara i te mea i ōku wā anake i konā, engari rawa ia ināiane i ahau kāhore i konā, nā, whakaotia tō koutou whakaoranga i runga i te wehi, i te wiri;

<sup>13</sup> ko te Atua hoki te kaimahi i roto i a koutou o te hiahia, o te mahi, hei mea i tāna i pai ai.

14 I ā koutou mahi katoa kaua te amuamu, te tautohetohe;

15 kia kore ai koutou e whaikupuria, kia tapatahi ai, he tamariki kohakore nā te Atua, i waenganui o te whakatupuranga tutū, parori kē, kei roto nei koutou i a rātou e tīaho ana hei rama i te ao;

16 kia mau pū ki te kupu o te ora; kia hari ai ahau ā te rā o te Karaiti, kīhai ahau i oma noa, kīhai i mahi noa.

17 Nā, ki te ringihia ahau ki runga ki te patunga tapu, ki ngā mahi a tō koutou whakapono, ka hari ahau, inā, ka hari tahi me koutou katoa.

18 Waihoki ko koutou, kia hari, hari tahi me ahau.

### *Ko Tīmoti rāua ko Eparatoritu*

19 Otiia, e mea ana ahau i roto i te Ariki, i a Īhu, ki te tonu tata atu i a Tīmoti ki a koutou, kia ora ai hoki tōku ngākau, ina mōhio ahau ki tō koutou āhua.

20 Kāhore hoki ōku tāngata rite te ngākau ki tōna, hei mahara pono ki ā koutou mea.

21 Ko tā te katoa hoki e rapu nei, ko tā rātou ake, kāhore ngā mea a Īhu Karaiti.

22 Ko koutou ia e mātau ana ki ōna tohu, he pērā tāna me tā te tamaiti ki te matua, ko tōku hoa ia ki te kawē haere i te rongopai.

23 Ko ia tāku e mea nei kia tonoa wawetia atu, ina kite ahau i te tukunga iho ki ahau.

24 Otiia, e ū ana tōku whakaaro i roto te Ariki, ka hohoro tōku tae atu.

25 I mea anō ia ahau me tonu atu ki a koutou a Eparatoritu, tōku teina, tōku hoa mahi, tōku hoa

hōia, nā koutou ia karere, he kaimahi anō hoki i ngā mea i matea e ahau.

<sup>26</sup> Kōingo tonu hoki ia ki a koutou katoa, kōnohi rawa, nō te mea i rongu koutou he tūrora ia.

<sup>27</sup> He tūrora rā hoki ia, tata pū ki te mate. Otirā, i tohungia ia e te Atua; ehara anō i te mea ko ia anake, ko ahau anō hoki, kei tāpiritia he pōuri ki tōku pōuri.

<sup>28</sup> Koia i nui rawa ai tōku ngākau ki te tonu atu i a ia, kia kite ai anō koutou i a ia, kia hari ai, kia tāharahara iho ai hoki tōku pōuri.

<sup>29</sup> Kia nui te hari i runga i te Ariki, ina tae atu ia; whakahōnoretia anō hoki ngā pērā;

<sup>30</sup> nō te mea nā te mahi ki a te Karaiti i tata ai ia ki te mate, te ihupuku ki te ora, kia rite ai i a ia ngā mahi ki ahau, kīhai nei i rite i a koutou.

### 3

#### *Te Tikanga Pono*

<sup>1</sup> Heoi, e ōku tēina kia hari i roto i te Ariki. Ki ahau kāhore he hōhā o te tuhituhi atu i aua mea nei anō ki a koutou; ki a koutou ia hei mea e ū ai.

<sup>2</sup> Kia tūpato ki ngā kurī, kia tūpato ki ngā kaimahi i te kino, kia tūpato ki te tapahanga.

<sup>3</sup> Ko tātou hoki te kotinga, e mahi nei ki te Atua i runga i te wairua, e whakamanamana nei ki a Karaiti Ihu, kāhore nei e ū te whakaaro ki te kikokiko.

<sup>4</sup> Otirā, tērā anō ahau e ū te whakaaro ki te kikokiko ki te whakaaro tētahi atu tangata he mea tāna e ū ai tōna whakaaro ki te kikokiko, tērā atu anō tāku.

<sup>5</sup> Ko te kotinga i te rā tuawaru, nō te whānau a Īharaira, nō te hapū o Pineamine, he Hiperu nō ngā Hiperu; ki tō te ture he Parihi;

<sup>6</sup> mō te ngākau nui ki te Atua, i whakatoī ahau i te hāhi; mō te tika, arā mō tērā i te ture, kāhore he kupu mōku.

<sup>7</sup> He ahakoa rā, ko ngā mea i waiho rā e ahau hei taonga ki ahau, kua kīa ake e ahau hei ruke-nga, i te mea ka whakaaro nei ki a te Karaiti.

<sup>8</sup> Āe rā, kīa iho e ahau ngā mea katoa hei ruke-nga, i te mea ka whakaaro nei ki te pai whaka-harahara o te mātauranga ki a Karaiti Īhu, ki tōku Ariki. He whakaaro nei ki a ia i riro ai ēnā mea katoa ōku ki te kore, āe rā, kīa iho e ahau hei paru, kia whiwhi ai ahau ki a te Karaiti;

<sup>9</sup> kia kitea ai hoki kei roto ahau i a ia, kāhore he tika ōku ake, arā he tika i te ture, engari ko tērā e nā runga ana mai i te whakapono ki a te Karaiti, ko te tika a te Atua nā te whakapono.

<sup>10</sup> Kia mātau ai ahau ki a ia, ki te kaha hoki o tōna aranga mai, ki te urunga tahitanga hoki ki ōna mamae, he mea whakaahua kia rite ki tōna matenga;

<sup>11</sup> me kore ahau e tutuki ki te aranga mai i roto i te hunga mate.

### *E Tāwhai ana ki te Tohu*

<sup>12</sup> Ehara i te mea kua mau rawa ahau, kua tino rite rānei ahau; engari e whāia atu ana e ahau, me kore e mau i ahau te mea i mau ai ahau i a Karaiti Īhu.

<sup>13</sup> E ōku tēina, kāhore āku kīanga ake kua mau i ahau, kotahi ia tāku: wareware ake i ahau ngā mea ō muri, whātoro tonu atu ki ngā mea i mua,

<sup>14</sup> ka tāwhai tonu ahau ki te tohu, ki te utu whakahōnore o tō runga karangatanga a te Atua, i roto i a Karaiti Īhu.

<sup>15</sup> Nā reira, ko te hunga o tātou kua tino rite, kia pēnei ō tātou whakaaro; ā, ki te rere kē ō koutou whakaaro ki tētahi mea, mā te Atua anō tēnei e whakakite ki a koutou.

<sup>16</sup> Engari, ko te wāhi kua taea atu e tātou ko tērā anō hei tikanga mō tā tātou haere.

<sup>17</sup> Kia rite tō koutou ki tōku, e ōku tēina, tirohia hoki te hunga e rite ana te haere ki tā mātou kua waiho nei hei tauira mō koutou.

<sup>18</sup> He tokomaha hoki kei te haere, ka maha nei ngā wā i kōrerotia ai rātou e ahau ki a koutou, ā, ka kōrerotia nei ināianei me te tangi anō ahau, he hoa whawhai rātou ki te rīpeka o te Karaiti.

<sup>19</sup> Ko te tukunga iho ki a rātou he whakangaro, tō rātou atua ko te kōpū, tō rātou korōria hoki kei runga i tō rātou whakamā, ko ngā mea o te whenua tā rātou e whakaaro ai.

<sup>20</sup> Ko te rangi ia te wāhi i tangata whenua ai tātou; kei reira hoki te Kaiwhakaora e tāria atu nei e tātou, te Ariki, a Īhu Karaiti.

<sup>21</sup> Māna nei e whakaahua kē tō tātou tinana tūtūā nei, kia rite ki tōna tinana korōria, i runga i te mahinga a tōna kaha e taea ai e ia te pēhi ngā mea katoa ki raro i a ia.

## 4

### *He Tohutohu*

<sup>1</sup> Heoi, e ōku tēina aroha, e hiahiatia atu nei, e tōku haringa, e tōku karauna, tēnā rā, e tū i runga i te Ariki, e ōku hoa aroha.

<sup>2</sup> He kupu tēnei nāku ki a Ūoria, he kupu anō tēnei ki a Hinatiki, kia kotahi tō rāua whakaaro i roto i te Ariki.

<sup>3</sup> Nā, he tohe tēnei nāku ki a koe, e tōku hoa pono ki te mahi, ko koe hei whakamāmā i aua wāhine, he hunga rāua i uru tahi me ahau ki te tohe ki ngā mea o te rongopai, me Keremeneta anō, me ērā atu hoki o ōku hoa mahi, kei roto nei i te puka-puka o te ora o rātou ingoa.

<sup>4</sup> Kia hari tonu i roto i te Ariki; ko tāku kupu anō tēnei, Kia hari!

<sup>5</sup> Kia mōhiotia tō koutou ngākau ngāwari e ngā tāngata katoa. Kua tata te Ariki.

<sup>6</sup> Kua e mānukanuka ki tētahi mea; engari i ngā mea katoa whakaaturia ki te Atua ngā mea e matea ai e koutou, i runga i te karakia, i te inoi, me te whakawhetai hoki.

<sup>7</sup> Ā, mā te mārie o te Atua, e kore nei e taea te whakaaro, e tiaki o koutou ngākau, o koutou hine-ngaro, i roto i a Karaiti Īhu.

<sup>8</sup> Heoi, e ōku tēina, ko ngā mea e pono ana, ko ngā mea e whai hōnore ana, ko ngā mea e tika ana, ko ngā mea e kinokore ana, ko ngā mea e āta-ahua ana, ko ngā mea e kōrerotia paitia ana; ki te mea he pai, ki te mea he whakamoemiti; whakaroa ēnei mea.

<sup>9</sup> Ko ngā mea i whakaakona ki a koutou, i riro i a koutou, i rongo ai, i kite ai rānei ki ahau, mahia ēnei; ā, ka noho te Atua o te rangimārie ki a koutou.

### *He Mihi Whakawhetai mō te Koha*

<sup>10</sup> Nui atu ia tōku hari i roto i te Ariki mō tō koutou whakaaro ki ahau kātahi nei ka pihi ake

anō; he mea anō ia i whakaaroa e koutou i mua, otiia, kīhai i whai meatanga.

<sup>11</sup> Ehara tāku e kōrero nei i te mea mō te rawakore; kua ako hoki ahau, ahakoa kei hea ahau e noho ana, kia tatū tōku ngākau i reira.

<sup>12</sup> Ko te whakahoki i ahau ki raro, mātau tonu i ahau; ko te whai rawa, mātau tonu i ahau; i ngā wāhi katoa, i ngā mea katoa, ka oti ahau te whakaako, kia mākona, ā, kia mate i te kai, kia whai rawa, ā, kia rawakore rānei.

<sup>13</sup> Ka taea e ahau ngā mea katoa i roto i a te Karaiti e whakakaha nei i ahau.

<sup>14</sup> He ahakoa rā, he pai tā koutou mahi, i a koutou i uru nei ki tōku mate.

<sup>15</sup> Nā, e mātau ana anō rā koutou e ngā Piripai, i te tīmatanga o te rongopai, i ahau i haere atu ai i Makeronia, kāhore he hāhi i uru ki tāku tikanga; arā mō tētahi mea kia tukua atu, kia hōmai rānei, ko koutou anake.

<sup>16</sup> I Teharonika anō hoki kotahi, e rua, ā, koutou hōmaitanga i ngā mea i matea e ahau, kia kawea ake māku.

<sup>17</sup> Ehara i te mea e whai ana ahau i tētahi mea kia hōmai; engari e whai ana ahau kia maha ake ngā hua hei mea mā koutou.

<sup>18</sup> Otiia, kei te whiwhi ahau i ngā mea katoa, hira noa ake hoki āku; kua kī ahau, kua tae mai nei i a Epaporitu ngā mea i ahu mai i a koutou, he kakara reka, he patunga tapu e manakohia ana, ko tā te Atua e āhuareka mai ai.

<sup>19</sup> Ā, mā tōku Atua e mea kia hua ngā mea katoa e matea ana e koutou, kia rite ki te nui o tōna korōria, i roto i a Karaiti Īhu.

<sup>20</sup> Nā, waiho i te Atua, arā i tō tātou Matua, te korōria ake ake. Āmine.

*Poroporoaki*

<sup>21</sup> Oha atu ki te hunga tapu katoa i roto i a Karaiti Īhu. He oha atu tēnei ki a koutou nā ngā tēina i ahau nei.

<sup>22</sup> He oha atu tēnei ki a koutou nā te hunga tapu katoa, tēnei rawa ia tā te hunga o te whare o Hihā.

<sup>23</sup> Kia tau te aroha noa o tō tātou Ariki, o Īhu Karaiti ki a koutou katoa. Āmine.

## **Te Kawenata Hou**

### **Maori: Maori NT - converted from RTF LAI**

copyright © 1952,2008 Bible Society New Zealand Charitable Trust

Language: Māori

Contributor: Bible Society New Zealand

### **Te Kawenata Hou**

Maori New Testament

Bible Society New Zealand

This translation is made available to you under the terms of the Creative Commons Attribution-No Derivatives license 4.0.

You may share, redistribute, or adapt this Bible translation or extracts from it in any format, provided that:

You include the above copyright and source information.

You do not use this work for commercial purposes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-10-16

---

PDF generated using Haiola and XeLaTeX on 31 Oct 2025 from source files dated 31 Oct 2025

f5251fa7-4780-5900-96bf-6211b45050b2